



# **PERBINCANGAN RAKYAT DEMI MELAYU**

**SIRI 8/2022**

**TAJUK:  
KWSP: PENYELAMAT EKONOMI MALAYSIA?**

**Panel:**

**DR HAJI ABD HALIM HUSIN**

**DATO' NADZIM JOHAN**

**Ditranskrip Oleh:**

**NUR NATASHA BINTI NASRUN**

**Disunting Oleh:**

**NUR NATASHA BINTI NASRUN**

**Terbitan:**

**GABUNGAN DEMI MALAIU**

## **KWSP: Penyelamat Ekonomi Malaysia?**

Durasi: 1:12:28

### **Lokman Hakiem Abd Samad (moderator) = (1:46 - 2:54)**

Bismillahirrahmanirrahim, Assalamualaikum w.b.t dan salam sejahtera diucapkan kepada penonton setia Perbincangan Rakyat Demi Melayu. Pada malam ini, kita akan berbicara tentang topik KWSP. Adakah Kumpulan Wang Simpanan Pekerja ini merupakan penyelamat ekonomi? Jika kita lihat kepada group-group KWSP, kita dapat lihat komen-komen, reaksi-reaksi daripada netizen yang juga rakyat Malaysia. Masing-masing tanpa henti cuba untuk meminta dan mendesak agar diberi peluang terakhir bagi mengeluarkan KWSP ini. Jadi, bagi topik pada malam ini, KWSP: Penyelamat Ekonomi Malaysia? kita akan bersama dengan dua orang panel. Yang pertama, Dr Haji Abd Halim Husin yang merupakan Presiden bagi Dewan Perniagaan Melayu Malaysia (DPMM) dan juga Dato' Nadzim Johan (Toqqi) yang merupakan Pengurus Persatuan Pengguna Islam Malaysia (PPIM). Dengan itu, Perbincangan Rakyat Demi Melayu ingin mengucapkan selamat datang terutamanya kepada Tuan Haji. Assalamualaikum.

### **Dr Haji Abd Halim Husin (ahli panel) = (2:55 - 2:56)**

Waalaikumussalam w.b.t.

### **Lokman Hakiem Abd Samad (moderator) = (2:58 - 3:35)**

Baik, Tuan Haji. Apabila bercakap tentang KWSP ini seperti mana yang dilontarkan awal tadi. Jika kita lihat di Facebook dan Twitter terutamanya, majoriti rakyat Malaysia yang bekerja ini memang mendesak untuk mendapatkan keizinan bagi mengeluarkan KWSP pada ketika ini. Jadi, kita hendak mendapatkan pandangan Tuan Haji.

***Soalan: Apakah sebenarnya peranan Kumpulan Wang Simpanan Pekerja (KWSP) ini dan apa hak rakyat yang mempunyai simpanan KWSP ini? Silakan Tuan Haji.***

### **Dr Haji Abd Halim Husin (ahli panel) = (3:36 - 8:58)**

Baik, Assalamualaikum w.b.t. Terima kasih tuan pengurus majlis, Toqqi dan sahabat-sahabat kita yang berada di luar sana. Assalamualaikum w.b.t. Apakah peranan KWSP dan apakah hak

rakyat yang mempunyai simpanan tersebut? Pertama sekali peranan KWSP adalah sebagai simpanan untuk hari tua. Ini adalah simpanan yang dikuatkuasakan oleh kerajaan di mana semua pekerja perlu menyumbang kepada KWSP bersama dengan majikan mereka. Dengan mempunyai simpanan ini, akan meningkatkan simpanan untuk hari tua mereka dan simpanan ini dapat ditingkatkan melalui pelaburan-pelaburan yang dilakukan oleh KWSP. Jika wang itu disimpan di bawah bantal, wang itu tidak akan bertambah. Tetapi jika kita menyimpan di tempat lain seperti di bank contohnya, FB hanya 2% atau sehingga 3% sahaja sekarang dan setelah sekian lama FB memang 2% hingga 3% sahaja. Jadi, pulangan daripada KWSP ini dalam 5% ke 6% adalah lebih baik daripada menyimpan di bank. Apakah sebabnya kerajaan mewujudkan KWSP ini? Mengikut kajian yang dilakukan oleh kerajaan, orang Malaysia atau kebanyakannya orang Melayu ini tidak mempunyai simpanan untuk hari tua. Bagi mengadakan simpanan untuk hari tua ini, mereka terpaksa mengadakan satu simpanan di mana simpanan itu dipaksakan kepada mereka. Jika Tuan Syed dalam umur 40-an, 20 tahun dahulu ada satu buku Millionaire Mind yang ditulis oleh Harv Eker dan saya telah pergi kepada kursus yang dianjurkan oleh Harv Eker ini. Ramai orang yang telah pergi ke kursus tersebut. Dalam kursus tersebut, salah satu perkara yang diajar adalah menyimpan untuk hari tua dan simpanan pada hari tua ini tidak boleh dikeluarkan langsung. Mengikut teori Harv Eker, setiap simpanan perlu diadakan dalam beberapa tabungan. Sebagai contoh, yang pertama adalah simpanan untuk hari tua, yang kedua untuk *investment*, yang ketiga untuk mereka *reward* diri mereka setiap bulan dan keempat untuk kecemasan. Jadi, bagi empat tabungan ini, yang kedua tadi iaitu *investment* boleh dikeluarkan setelah beberapa tahun apabila sudah cukup untuk membeli rumah, kereta atau barang-barang yang diperlukan oleh pecah *room*. Kecemasan memang hanya dikeluarkan untuk kecemasan sahaja. Tetapi bagi simpanan hari tua, mengikut Harv Eker, memang tidak boleh dikeluarkan langsung walaupun kita rasa terpaksa untuk mengeluarkannya, tetapi secara dasarnya memang tidak boleh dikeluarkan. Jadi, apakah hak rakyat yang memiliki simpanan tersebut? Saya rasa ini konsisten dengan pendirian Dewan Perniagaan Melayu atau MTEM pada tidak silap saya sebulan yang lalu. Kita tidak menyokong untuk mengeluarkan simpanan hari tua ini buat masa sekarang kerana akan mengganggu dan melemahkan simpanan pada hari tua yang akan datang.

Itulah yang saya fikirkan buat masa ini. Kemudian nanti saya akan ulaskan dengan lebih panjang berkenaan dengan perkara ini.

**Lokman Hakiem Abd Samad (moderator) = (8:59 - 9:59)**

Jadi, Tuan Haji, sekadar hendak mendapatkan pandangan. Tadi Tuan Haji ada menyebut bahawa orang kita ini memiliki kelemahan dari segi penyimpanan wang untuk masa tua. Muhy tidak muhy terpaksa bergantung kepada KWSP. Jadi, punca perkara ini adakah disebabkan memang sistem kita begini atau kita tidak diajarkan atau tidak dididik sejak awal untuk memiliki simpanan kecemasan walaupun jika kita bercakap tentang takaful, misalnya. Masyarakat kita agak takut untuk membayarnya sedangkan itu membantu mereka pada waktu kecemasan. Sama juga dengan KWSP, ketika mereka hendak membeli rumah misalnya, itulah simpanan yang ada.

***Soalan: Apakah komen Tuan Haji tentang masalah pemikiran orang-orang kita yang sangat takut untuk menyimpan selain daripada KWSP untuk masa sukar mereka dan masa tua mereka?***

**Dr Haji Abd Halim Husin (ahli panel) = (10:01 - 12:06)**

Ya, Encik Hakiem. Kita memang menyedari bahawa orang Melayu kurang menyimpan terutamanya disebabkan mereka pendapatan mereka ini rata-ratanya adalah kurang. Jadi, apabila berkurangan, mereka tidak dapat menyimpan untuk hari tua dan kecemasan. Sebagai contoh, jika kita lihat graduan di Malaysia ini, ada 1.5 juta graduan yang gajinya di bawah RM3000. Pada masa sekarang, RM3000 ini hanya beberapa ratus sahaja lebih tinggi daripada RM2700 iaitu *fair living wage* yang dikeluarkan oleh Bank Negara dan RM2080 adalah had minima untuk jatuh kepada kemiskinan bandar. Jadi, untuk menyimpan adalah satu perkara yang sukar bagi mereka. Oleh sebab itu kerajaan terpaksa mengesyorkan dan menguatkuasakan satu akta di bawah KWSP bahawa setiap pekerja perlu menyimpan secara paksa ke dalam simpanan tersebut. Jadi, memang ini akan menyebabkan mereka terdesak sedikit, tetapi jika sudah terbiasa menyumbang untuk setiap bulan, ini akan menjadi kebiasaan dan mereka tidak akan lagi tertekan disebabkan pengurangan sebanyak 10% atau 11% daripada gaji mereka yang dikeluarkan oleh majikan.

**Lokman Hakiem Abd Samad (moderator) = (12:08 - 13:13)**

Jadi, jika kita lihat di sini, antara punca orang kita terpaksa mengikut sistem yang ditetapkan oleh kerajaan adalah kerana bergaji atau berpendapatan rendah. Jika kita lihat di bandar, dengan kos sara hidup yang tinggi, itu menjadi punca mereka sukar membuat simpanan yang lebih. Jadi, kita pernah mendengar beberapa tahun dahulu ada yang mendesak agar gaji minima dinaikkan, contohnya. Menyeimbangkan dengan kos sara hidup dan sebagainya. Perkara ini juga jika kita lihat dari segi potongan KWSP itu melihat kepada jumlah gaji individu.

***Soalan: Jadi, bagaimana dengan keseimbangan ini yang boleh kita capai? Adakah bermaksud jika gaji minima pekerja itu dinaikkan, mereka boleh menyimpan di KWSP dengan mudah dan tenang dan mereka boleh membuat simpanan yang lain dengan cara yang lebih mudah? Bagaimana pandangan Tuan Haji berkenaan perkara ini?***

**Dr Haji Abd Halim Husin (ahli panel) = (13:15 – 15:28)**

Berkenaan gaji minima ini, sebenarnya mungkin boleh dibincangkan dalam satu forum yang lain. Pada petang tadi kita telah mengadakan perbincangan di Economic Action Council (EAC) di mana 2 penyampai telah menyampaikan pendapat mereka berkenaan *high income nation* dan *sustainable income*. Jadi, perkara yang disebutkan oleh tuan tadi adalah untuk menaikkan gaji. Sebenarnya, kenaikan gaji ini adalah amat relatif dengan kenaikan sara hidup. Jika gaji kita tinggi tetapi sara hidup kita lebih tinggi, bermakna tidak akan *compensate* apa yang kita dapat. Sebagai contoh di Singapura, jika seseorang kerani mendapat gaji RM3500 tetapi jika mereka duduk di Singapura, menyewa di Singapura dan menjalankan kehidupan di Singapura, bermakna mereka telah jatuh ke dalam jurang kemiskinan. Itulah sebab kebanyakan pekerja di Singapura menyewa di Johor Bahru. Apabila mereka menyewa di Johor Bahru, mereka memerlukan RM1000 untuk menyewa satu rumah. RM1000 hanya bersamaan dengan RM300 di Singapura. Ini disebabkan oleh *exchange rate* yang berlainan dan menyebabkan mereka sanggup berulang-alik dari Johor Bahru ke Singapura sehingga lewat malam dan 2 jam bagi satu perjalanan untuk mendapatkan gaji yang lebih tinggi. Jadi, sebenarnya kenaikan gaji bukan menjadi isu yang utama tetapi cost of reading yang tinggi akan menjelaskan kenaikan gaji tersebut. Sebagai contoh, baru-baru ini kerajaan cuba menaikkan gaji minima daripada RM1200

kepada RM1500. Kami di pihak Dewan Melayu memang bersetuju dengan cadangan tersebut kerana seperti yang saya katakan tadi, RM2080 sudah dikira termasuk dalam golongan miskin di bandar. Jadi, RM1500 ini adalah lebih rendah daripada RM2080 dan RM1500 ini adalah gaji minima. Jika anda mempunyai PMR atau SPM, gaji anda hanya RM1500. Bagaimanakah perasaan orang telah belajar selama 4 tahun untuk mendapatkan ijazah mereka tetapi hanya mendapat RM1500 juga? Jadi, ini adalah perkara yang perlu dilihat dan kerajaan perlu melihat secara holistik bagaimana untuk menurunkan kos sara hidup di samping menaikkan sedikit gaji supaya kita lebih selesa berada di Malaysia ini.

**Lokman Hakiem Abd Samad (moderator) = (15:30 – 18:31)**

Baik, sementara kita menunggu respon daripada pihak Toqqi untuk membuka kamera, kita bersempang dahulu dengan Tuan Haji. Seingat saya, ketika saya menjekukkan kaki di Kuala Lumpur dahulu, kos permulaan itu sangat rendah. Nampaknya Toqqi sudah bersedia, Alhamdulillah. Baik, Toqqi. Tadi kita sudah bersempang serba-sedikit dengan Tuan Haji tentang pengenalan berkenaan KWSP ini. Kita lihat pelbagai komen di Facebook. Mendesak itu dan ini untuk mengeluarkan KWSP.

***Soalan: Menurut kata DPMM, KWSP itu perlu disimpan kerana sangat penting untuk hari tua nanti. Bagaimana dengan pandangan PPIM pula? Bagaimana setakat ini, adakah menerima sebarang aduan daripada rakyat yang terjejas kerana masalah simpanan dan mereka sangat menginginkan bantuan PPIM untuk membolehkan mereka mengeluarkan KWSP?***

**Dato' Nadzim Johan (ahli panel) = (18:32 – 29:19)**

Sebenarnya kita hampir setiap hari menerima aduan ini dan pelbagai usaha telah kita lakukan. Memang kita melihat dari sudut simpanan masa tua, tetapi takut jika tidak sempat sampai ke hari tua. Sebelum masalah-masalah ini seperti yang hampir bankrap, masalah Ah Long dan sebagainya tetapi oleh sebab diikat dengan akta, memang tidak boleh mengeluarkan wang selain daripada cukup umur. Tiada kaedah lain walaupun hendak bankrap sekali pun kecuali sakit. Tetapi saya lihat ada keadaan-keadaan tertentu di mana simpanan masa tua itu mungkin penting tetapi hendak menyampaikan kehidupan itu juga amat penting kerana sekiranya seseorang itu

bankrap dan tidak boleh bekerja, maka kehidupannya akan menjadi huru-hara. Jadi saya rasa justifikasi itu perlu dilihat juga. Jangan sampai seseorang itu kehilangan keupayaan untuk menjadi produktif. Tetapi itu tidak diterima oleh KWSP pada masa itu. Tetapi dalam keadaan hari ini, kita lihat orang bunuh diri. Adakah sebaiknya kita biarkan dia membunuh diri atau membenarkannya mengeluarkan wang? Jadi, ini merupakan satu persoalan yang perlu kita fikirkan. Kita tahu kerajaan manage orang tetapi kita juga tahu bahawa kerajaan dalam keadaan tertentu terpaksa membuat perkara yang mungkin tidak patut atau tidak sesuai. Jadi, dalam isu mereka yang hendak dibankrapkan, kita perlu menimbang. Mungkin ada kaedah tertentu yang boleh dilakukan. Sebagai contoh, mereka boleh meminjam tetapi untuk memastikan mereka terus dapat bekerja tetapi simpanan contohnya 10% atau 11% perlu ditambah kepada 16% ke 17% untuk bulan-bulan hadapan. Saya hendak kongsikan sedikit, banyak orang bermiaga yang walaupun sebenarnya pantang larang meminjam daripada Ah Long. Tetapi ada juga orang yang bermiaga yang tidak mendapat bayaran yang telah dijanjikan oleh agensi atau pembekal untuk menerima bayaran tetapi tidak menerima bayaran. Kerajaan kata bayar dalam masa maksimum 2 bulan atau 2 minggu, saya tidak ingat. Tetapi bayaran tidak diterima juga. Mungkin ada *variation order* dan sebagainya. Jadi, sehingga menyebabkan mereka terdesak dan tidak mampu membayar gaji dan sebagainya. Akhirnya, mereka meminjam daripada Ah Long. Meminjam daripada Ah Long ini memang penyakit yang dahsyat tetapi sesetengah peniaga tidak mempunyai pilihan. Rumah akan dilelong, kereta akan ditarik atau elektrik hendak dipotong. Jadi, mereka perlu melakukan sesuatu yang drastik sama ada meminjam daripada Ah Long atau daripada KWSP jika boleh membuat sesuatu. Contohnya membuat *charge account* agar mereka terus dapat menyumbang dalam jumlah yang lebih dalam keadaan tertentu. Jadi, dalam konteks ini seperti yang saya katakan tadi, peniaga ini memang tidak menyukai Ah Long tetapi Ah Long menyambung kehidupan mereka. Jika tidak, kehidupan mereka akan menjadi lebih teruk. Pinjaman Ah Long ini 10% sebulan dan bukannya 2% setahun seperti menyimpan di dalam AFD. Jadi, kita perlu mewujudkan satu keadaan yang kondusif dan boleh menyambung usaha orang Malaysia ini untuk mencari sumber pendapatan. Jika hari ini sudah mula ada pinjaman tertunggak, mempunyai CTOS dan CCRIS, keadaan-keadaan ini tidak menggalakkan. Saya lihat kadangkala polisi yang dibuat untuk meminjam bank, perlu ada CCRIS 10 tahun dahulu.

Kadangkala ada yang berhutang duit stem RM5 pun mereka masukkan ke dalam CCRIS. Jadi, kita perlu menyelesaikan masalah ini dalam pelbagai aspek. Yang pertama melalui media, untuk menyambung kehidupan. Yang kedua adalah untuk merancang bagaimana untuk memudahkan perjalanan hidup kita kerana kebanyakan di luar sana tidak menyenangkan. Jika kita lihat Menteri sekalipun, mereka hendak menyusahkan hidup rakyat juga. Jadi, kita sebagai pengguna berhadapan dengan realiti di mana orang hendak membunuh diri, cerai-berai, dan pelbagai lagi. Kita perlu serius dan *consider*. Saya juga hendak mengambil kesempatan ini untuk memberi komen sedikit iaitu berkaitan gaji besar. Gaji besar ini memang penting tetapi ada rakan-rakan kita yang bergaji RM14000 dan lebih juga tidak dapat meminjam dan wang dan masih ada juga yang meminjam daripada Ah Long. Apa yang saya lihat di sini, kita pihak dewan di sini bercerita tentang perniagaan. Tetapi kita juga perlu lihat bagaimana hendak menyediakan ahli-ahli peniaga yang mempunyai jati diri yang kuat dan mempunyai polisi yang jelas. Kita lihat hari ini memang sudah menjadi tabiat atau budaya orang Melayu yang sukar untuk menyimpan wang. Mungkin juga disebabkan tidak pernah mempunyai wang yang mencukupi untuk menyimpan tetapi kita tidak boleh menyalahkan mereka. Saya ingat bapa saya bercerita ketika zaman 30-an dahulu, ceti-ceti ini hanya bergaji RM10 sebulan. Tetapi mereka menjaga wang. Mereka hanya menggunakan RM1 sebulan untuk makan. Mereka membuat cappati pun hanya dibakar di atas cangkul besi. Bagaimana keadaan mereka? Baki RM9 dipinjam. Maknanya, terdapat charge interest juga. Kita bukanlah hendak berada dalam keadaan begitu tetapi apa yang saya hendak kongsikan ialah mungkin kita boleh wujudkan satu kaedah atau cara untuk mengubah. Saya rasa ilmu ini cukup baik jika diambil oleh Dewan Perniagaan Melayu kerana ini melatih orang Melayu untuk mempunyai pegangan tertentu, mempunyai hati yang mempunyai kehendak yang baik. Bukannya hendak menjadi kaya untuk membuat rumah yang besar sahaja dan berkereta besar sahaja tetapi hendak bersama-sama bertanggungjawab dalam membina negara kita. Jika kita lihat Cina, mereka yang mempunyai wang pun masih berjimat-cermat, inikan pula yang tiada wang dan mereka bersungguh-sungguh. Kita kurang bersungguh-sungguh dan duit pun kurang ada. Kemudian apabila kita terdedah dengan wang, kerana belajar di luar negara dan apabila pulang mempunyai wang yang sebelum ini kita tidak nampak boleh membuat pinjaman, akhirnya ramai yang terperangkap dalam keadaan hari ini dalam perbelanjaan yang tinggi

melalui kad kredit, dan sebagainya. Akhirnya, merosakkan keadaan mereka sendiri dan keluarga. Jadi, yang terbaik adalah KWSP sendiri pun harus dalam usaha mengubah jati diri atau hati-hati orang-orang kita ini supaya cekal, bersungguh-sungguh, beriltizam, dan berdisiplin. Pada masa yang sama, saya juga hendak mengatakan bahawa mungkin yang hendak mengajar itu pun tidak mempunyai ilmu, jadi kurang pandai dalam mendidik. Masyarakat kita yang dahulunya belajar di luar negara dan pulang menjadi *coach* kepada orang-orang yang berniaga. Jadi, kadangkala mereka bercakap lebih daripada pengalaman mereka. Saya rasa kita perlu *address* isu asal. Isu asal itu adalah bagaimana hendak menangani atau mengurus tadbir wang atau masa yang kita ada. Mungkin itu sahaja untuk setakat ini.

**Lokman Hakiem Abd Samad (moderator) = (29:33 – 29:48)**

Baik, tadi Toqqi ada menyebut bahawa PPIM ada menerima permintaan daripada orang ramai untuk membantu mereka mendapatkan KWSP ini.

***Soalan: Mungkin ada statistik sudah berapa ramai setakat ini?***

**Dato' Nadzim Johan (ahli panel) = (29:49 – 30:36)**

Baik, yang kita bawa hari itu ada dalam 70,000 orang. Ini adalah kes realiti. Sebagai contoh, jika 70,000 orang ini bercerai, atau ada yang membunuh diri, maka matlamat masih belum tercapai kerana kita mungkin lebih hendak menyesuaikan dengan keadaan semasa tetapi perancangan masa hadapan perlu ada juga. Saya lihat perkara ini kurang ada sama ada berlaku dalam orang Melayu, GLC, atau mereka yang mengurus tadbir GLC ini pun sebenarnya banyak kelemahannya jika hendak buka pun memang tidak akan habis.

**Lokman Hakiem Abd Samad (moderator) = (30:39 – 31:28)**

Baik, terima kasih Toqqi atas penerangan itu. 70,000 merupakan satu angka yang bukan sedikit. Daripada Hezri Sardi, katanya untuk menyelesaikan masalah ini, salah satu caranya ialah “Sistem persaraan negara mesti diubah.” Bagi pusingan yang kedua, kita hendak bertanya dengan Tuan Haji semula. Jika kita pandang secara realiti dan holistik, adakah orang kita ini sebenarnya sudah bersedia dengan masalah kehidupan. Katakanlah tiba-tiba kerajaan mengatakan bahawa boleh mengeluarkan KWSP semua sekali, bukan setakat RM10,000.

**Soalan: Bagaimana persediaan orang Melayu terutamanya untuk menghadapi bulan dan tahun yang seterusnya jika perkara ini sedang berlaku?**

**Dr Haji Abd Halim Husin (ahli panel) = (31:31 – 40:39)**

Jika kerajaan membenarkan KWSP dikeluarkan semuanya, saya rasa akan berlaku dua senario. Yang pertama, kebanyakan mereka akan lebih sukar pada masa akan datang. Yang kedua, ada yang akan lebih kaya daripada apa yang mereka ada sekarang. Kita hendak lihat yang pertama tadi. Kebanyakan akan lebih sukar pada masa akan datang. Hal ini disebabkan KWSP yang ada sekarang, caruman di bawah 10,000, Melayu adalah sebanyak 74% iaitu 4.4 juta orang Melayu yang simpanannya kurang daripada RM10,000. Jika mereka dibenarkan mengeluarkan RM10,000, maka 74% daripada pencarum ini akan mengeluarkan caruman mereka dan mereka tidak akan ada simpanan hari tua langsung jika keadaan ini berterusan. Oleh kerana sekarang ini kita mengatakan bahawa keadaan kita susah disebabkan oleh Covid, banjir, dan kos sara hidup yang lebih tinggi, jadi dengan RM10,000 hanya akan bertahan jika mereka ingin membayar hutang dan menyara kehidupan mereka yang saya rasa ekstravaganza sekarang ini. Maka, pada masa akan datang mereka akan lebih susah. Jika mereka terus menyimpan RM10,000, dalam masa 25 tahun, simpanan itu akan bertambah kerana KWSP ada memberikan dividen. Dividen KWSP adalah lebih kurang 5.8% hingga 6%. Sebenarnya sudah beberapa tahun *rate* itu dikekalkan. Cuma saya hendak memberikan komen di sini bahawa pada masa Malaysia mempunyai peningkatan ekonomi yang ketara dahulu apabila ASN atau ASB memberi sehingga 12% ke 13% dividen, KWSP masih lagi memberikan lebih kurang jumlah yang sama. Mereka mengatakan bahawa apabila keadaan yang mencabar, mereka akan memberikan lebih kepada pencarum-pencarum ini. Sehingga kini, saya rasa sudah hampir 20 tahun saya mencarum di KWSP. Jadi, *rate* nya masih dalam 5% hingga 6% sahaja. Golongan kedua tadi yang mempunyai lebih daripada RM10,000, kebanyakan daripada mereka adalah orang-orang yang mempunyai high income yang kita anggarkan lebih daripada RM240,000 pada masa *retirement* mereka, mereka mempunyai lebih RM240,000 dalam KWSP untuk dikeluarkan dan untuk mereka menyambung kehidupan mereka selepas *retirement*. Cuma 27% sahaja yang mempunyai RM240,000. 27% itu merupakan satu jumlah yang sangat rendah dan akan berlaku ketidakseimbangan antara orang yang mempunyai simpanan dengan orang yang tidak

mempunyai simpanan. Jadi, apabila mereka susah, akan banyak berlaku perkara-perkara yang kurang menyenangkan seperti yang Toqqi katakan tadi. Jika sekarang ini terdapat 70,000 orang yang berdaftar dengan PPIM, mengadu dengan PPIM, perbelanjaan mereka tidak cukup untuk menampung kehidupan mereka pada masa sekarang, jika semuanya dikeluarkan, maknanya lebih ramai yang akan datang kepada PPIM. Sebanyak 4.4 juta orang akan mendaftar dengan PIM nanti. Seperti yang Toqqi katakan tadi, orang yang bergaji RM14,000 ke RM15,000 masih lagi tidak dapat mengawal perbelanjaan mereka. RM14,000 ke RM15,000 adalah satu jumlah yang sangat tinggi dan telah diklasifikasikan sebagai T20. Jadi, jika mereka tidak dapat memgawal perbelanjaan mereka, maka mereka ini sebenarnya adalah dalam kalangan B40 oleh kerana mereka tidak mempunyai simpanan dan tidak mampu menyambung kehidupan mereka tanpa hutang. Berkenaan dengan simpanan KWSP yang Toqqi katakan tadi, jika mereka boleh mengeluarkan atau meminjam daripada KWSP, kemudian boleh membayar dengan sekian-sekian peratus, saya rasa itu satu cadangan yang membina dan boleh dipertimbangkan oleh kerajaan kerana sebab utama kerajaan tidak mahu mengeluarkan KWSP ini adalah disebabkan mereka ini terikat dengan *investment-investment* yang telah dilakukan sebelum ini dan jika kita cairkan sekarang, ia akan merugikan KWSP ini dan tidak akan memberikan pulangan kepada pencarum. Ini akan menjadi *double blow* kepada KWSP jika orang mengeluarkan wang dan mereka terpaksa mencairkan kewangan mereka, kewangan mereka akan turun bukan sahaja pada harga kos tetapi kurang daripada harga kos. Jika mereka *invest* dalam satu *fund* yang sebaanyak 1 juta, jika mereka 3.7 juta sahaja. 30% itu akan hilang tidak akan dapat dikembalikan kepada KWSP dan KWSP akan mendapat defisit seperti yang saya katakan tadi. Itu sahaja komen saya. Terima kasih.

**Lokman Hakiem Abd Samad (moderator) = (40:40 – 41:37)**

Baik, terima kasih Tuan Haji atas komen itu. Tadi Tuan Haji ada menyebut bahawa KWSP terikat dengan *investment*. Jika menyerahkan dan membenarkan rakyat untuk mendapatkannya bermakna ada asset-aset yang perlu dicairkan dan sebagainya. Tadi Toqqi juga ada membincangkan bahawa KWSP boleh memudahkan orang untuk membuat pinjaman dan sebagainya.

**Soalan:** Selain daripada perkara ini, sebagai wakil PPIM, apakah peranan yang boleh PPIM lakukan kerana kita lihat sekarang ini tempat terakhir yang rakyat tinggal bergantung cuma KWSP sahaja. Ah Long memang tidak boleh. Bank tidak lepas kerana ada CTOS dan CCRIS. Jadi, bagaimana dengan pandangan PPIM? Silakan.

**Dato' Nadzim Johan (ahli panel) = (41:38 – 44:31)**

Mungkin dia boleh buat, katakan pinjaman daripada bukan komuniti kredit tetapi daripada bank yang dijamin oleh KWSP. Maknanya, jaminannya ialah membayar semula setelah mengikut peratusan. Jadi, tidaklah terdesak sangat. Maknanya, boleh bayar semula dalam tempoh 10 tahun. Tetapi dia kena bayar yang sekarang dan yang lepas. KWSP hanya menjamin. Jadi, tiadalah komitmen apa-apa. Jaminan daripada KWSP, wangnya kemudian akan diuruskan oleh KWSP untuk membayar hutang-hutang daripada bank seperti Bank Simpanan Nasional kerana selepas after roll, memang patut pun mereka memberi dividen pun 5% hingga 6% sahaja. Jadi, saya melihat dari sudut itu. Mungkin jika kitab oleh lihat dari sudut yang lebih besar dan munasabah kerana kita lihat KWSP ini saya yakin mendapat untung yang besar. Pelaburan-pelaburan dan untungnya besar tetapi faedah kepada pencarum hanyalah 5% hingga 6% sahaja. Maknanya, jika duit banyak sekalipun, tetapi jika tidak boleh digunakan, sebagai contohnya sakit, bunuh diri, tak jadi apa juga. Jadi, saya hendak minta kaedah mana yang boleh diberikan *consideration* untuk mereka ini dibantu tanpa menjelaskan KWSP. Jika mereka meminjam dengan Bank Simpanan Nasional dengan kadar yang paling munasabah, saya rasa perkara ini masih boleh dilayan. Jadi, jika mereka tidak meninggal dunia sekarang, apabila tua nanti mereka adalah duit. Maknanya perlu berkira-kira jumlah maksimum hutang daripada jumlah yang mereka ada sehingga mereka tua. Saya rasa perkara sebegini perlu dikaji.

**Dr Haji Abd Halim Husin (ahli panel) = (44:35 – 44:57)**

Jadi Toqqi, KWSP menjamin sehingga ke tahap jika mereka memasukkan RM200,000 di dalam KWSP, jadi KWSP boleh menjamin sehingga RM200,000?

**Dato' Nadzim Johan (ahli panel) = (44:58 – 52:48)**

Itu bergantung kepada kira-kira. Mungkin setengah, mungkin beberapa peratus, jadi bukan duit KWSP dan mereka akan membayarnya. Kita kena lihat kepada kaedah juga kerana kita melalui begitu banyak cabaran sekarang ini. Masa lega dahulu kita tidak kisahkan orang pun, tidak kisahkan dunia pun. Kita ini juga sebahagian daripada kerajaan. Jadi, sebenarnya memang kita agak lemah dalam isu-isu berjimat, isu-isu meningkatkan produktiviti, kita macam tidak membuat kerja, sebenarnya. Kita lihat mana agensi yang buat kerja dengan cemerlang? Kita ada berbelas agensi setiap kementerian, mana agensi yang *come out strong* dan boleh diberi pujian? Kita hendak lihat bagaimana kita hendak buat kerana saya tidak rasa kita telah memberikan fokus untuk membantu kerana kita tidak dididik untuk membantu. Yang paling malang, masyarakat kita tidak dididik untuk membantu sehingga perkara yang senang pun menjadi susah. Sebagai contoh, jika kita semua hendak menambahkan pendapatan orang, seperti memberi lesen, lesen berniaga pun susah untuk didapatkan. Saya tidak faham mengapa perlu disusahkan. Dikira atau diatur supaya ada nilai dan nilai bertambah. Saya lihat ada sesetengah agensi di mana agensi ini melibatkan agama dan melibatkan wang. Hendak mendapatkan duit cukup susah tetapi mereka boleh membuat bangunan yang begitu cantik dan nilainya saya rasa 2 hingga 3 kali ganda. Tetapi Tabung Haji pun melakukan perkara yang sama. Seingat saya ketika saya berumur 25 tahun dahulu, saya sudah bergaduh dengan pengarah besar Tabung Haji ketika itu kerana hendak memasang karpet 5 bintang. Apa perlunya karpet 5 bintang untuk bangunan Tabung Haji ini? Akhirnya mereka terpaksa menyewa bangunan sebelah kerana tidak cukup kawasan. Kita perlu bertanggungjawab. Kita ada orang susah yang perlu kita bantu tetapi kita seolah-olah seronok untuk bergaya dan menunjuk-nunjuk. Saya rasa tidak perlu. Tiada apa yang kita hendak tunjukkan. Jika hendak menunjuk pun setelah kaya, senang dan sebagainya. Betul kita boleh mengembalikan maruah kita tetapi bukan dengan bangunan yang cantik dan kos yang tinggi. Saya tidak fikir itu boleh membawa hormat orang kepada kita tetapi jika kita disiplin, rajin dan bersungguh-sungguh, barulah orang akan hormat. Kita perlu lihat dari sudut mengubah jati diri. Bangunan cukup cantik tetapi masih ramai yang tidak makan di luar sana. Jadi, kita seharusnya menjadi realistik. Sudah-sudahlah. Zaman sekarang ini hendak *survive* pun belum tentu. Saya rasa kita perlu ubah. Kita tidak melatih diri kita untuk berjimat. Rakyat tidak, negara pun tidak.

Kita mesti ingat bahawa kita ini sebahagian daripada negara kerana Menteri yang dilantik itu pun daripada kampung yang sama dengan kita juga. Jadi, kita tidak membantu orang, Menteri pun tidak membantu kita. Kita perlu menerima hakikat bahawa kita lemah dan apabila kita lemah, kaum lain pun memandang hina kepada kita. Kita tidak perlu marah kerana adik-beradik kita pun menghina kita ajika kita lemah. Jadi, asasnya kita perlu membuat sesuatu untuk membela diri agar kita menjadi produktif dan dapat membela serta membuat sesuatu dan membawa perubahan. Bukannya menyewa bangunan mahal. Selagi kita tidak mengubah sikap kita, perkara ini akan menjadi lebih teruk. Tidak masuk kepada faktor rasuah lagi. Yang terkini, baru semalam datang hendak meminta tolong di mana ada satu pekerjaan tanah diberikan kepada MARA sebanyak 5000 ekar. MARA masuk dalam *company* lalu menjual *company*. Jual pula tanah reserved. Maknanya kita aini terlalu dahsyat, lemah dan tidak berinovasi. Kita harapkan orang muda kita yang akan membawa perubahan. Jika tidak, tiada sesiapa takut kepada kita sehingga penjenayah pun tidak takut pada polis. Biar tidak pandai tetapi jangan pandai menipu.

**Dr Haji Abd Halim Husin (ahli panel) = (52:49 – 56:31)**

Boleh saya kongsikan sedikit? Tadi kita berbincang dengan world bank yang menganalisa berkenaan Malaysia pada waktu sekarang ini. Ada beberapa mesej yang beliau sampaikan. Yang pertama ialah untuk mencapai *high income nation* atau *high income country*, kita mempunyai *weak institution* dan *community resilience*. Kita ada lebih kurang 200 organisasi yang mengawal atau menjaga usahawan tetapi tidak ada satu pun yang menonjol melainkan MEDEC. MEDEC menonjol kerana mempunyai Menteri. Kita memerlukan *strong physical position* di mana kita memerlukan mengecilkan 100 atau 200 agensi yang melihat kepada satu perkara sahaja. Ini disebabkan setiap kali pertukaran kerajaan, kita mempunyai Menteri-menteri yang mempunyai visi yang berlainan. Apabila mereka mempunyai visi yang berlainan, mereka menujuhkan satu badan atau satu jawatan atau agensi yang mereka boleh *concentrate* dan meninggalkan agensi-agensi lain yang telah sedia ada untuk beroperasi sendiri. Mereka yang membuat KPI, mereka yang mencapai KPI dan mereka meminta bonus dan bantuan dan peruntukan daripada kerajaan. Mesej ketiga yang saya dapat, soalannya ialah “*Why am I poor when my country is rich?*” Kita semua berasa miskin sedangkan dalam statistik mengatakan bahawa kita ini orang kaya, banyak *resources*, sales kita di luar negara tinggi, dan orang suka melabur di sini tetapi

sebenarnya itu adalah keuntungan kepada industri-industri yang besar dan telah mengeksplorasi rakyat kita dan orang asing. Itulah sebab gaji kita rendah dan kita tidak dapat menyimpan pada hari tua.

**Dato' Nadzim Johan (ahli panel) = (56:37 – 56:40)**

Boleh tak saya hendak berkongsi sedikit lagi sebelum penutup?

**Lokman Hakiem Abd Samad (moderator) = (56:41 – 56:42)**

Boleh, silakan.

**Dato' Nadzim Johan (ahli panel) = (56:42 – 1:05:15)**

Saya hendak bawa isu ini kepada Tuan Halim kita. Pada pandangan saya, jika kita hendak bangkit, kita tiada pilihan lain selain pulang kepada amalan Islam itu sendiri. Mungkin sesetengah orang faham dan mungkin sesetengah orang tidak. Saya hendak kongsi sedikit pengalaman yang betul-betul dekat dengan kita. Adakah tuan biasa melihat burger otai? Brother Suhaimi ini dengan kita sudah 20 tahun. Mula-mula dahulu dia hanya membawa motosikal. Kumpulan motosikal kecil sahaja, bukan besar. Sekarang ini gerainya sudah ada kira-kira 400 buah. Saya rasa *managernya* ada 18 orang. Saya hendak kongsikan bahawa mereka bermula dengan tiada apa-apa, tetapi Alhamdulillah mereka amat berjaya hari ini. *Manager-managernya* semuanya berkenderaan Vellfire yang dibayar oleh syarikat. Nombor plat kereta pun semua sama iaitu 363. Terdapat beberapa perkara yang perlu kita *highlight* di sini. *Manager* mereka membayar zakat sebanyak RM5000 sebulan. Kita memang bersama dengan dia dan ketika mesyuarat, dia akan parkir motosikalnya jauh kerana dia hanya menaiki motosikal. Tetapi saya lihat ada suatu perkara yang membawa satu perubahan besar kepadanya iaitu cara mereka bersembahyang. Disiplin sembahyang yang bersungguh-sungguh. Semua seragam dan disiplin. Mereka menterjemahkannya ke dalam bisnes. Jika memotong bawang, semua bawang dipotong dengan sama. Jadi, saya rasa jika hendak dilatih betul-betul, tidak sukar. Kita lihat McDonalds, jika kita tangkap anak-anak muda yang membawa motosikal sana-sini itu, hari ketiga dia sudah boleh bersama duduk di kaunter kerana mempunyai disiplin. Disiplin ini yang kita tidak ada sebenarnya. Saya lihat kumpulan ini mempunyai disiplin, bersungguh-sungguh dan cuba

mengamalkan prinsip-prinsip Islam itu. Jadi, kita hendak pulang ke mana? Tidak mungkin kitab oleh membuat kaedah baharu. Jika *world bank* datang pun, mereka pun kuat menipu juga. Jadi, kita perlu bawa perubahan dalaman yang membawa perubahan kepada kita supaya kita tidak lagi hidup dalam keadaan penakut dan ikut sahaja semua orang. Kita tiada jati diri. Aqidah pun lari. Itu yang kita amalkan hari ini. Jadi, mana kita hendak dapatkan kebaikan daripada amalan. Aqidah pun lari, solat pun tentu huru-hara. Saya tidak fikir kita boleh ke mana-mana. Kita lihat juga GISB. GISB ini ialah 19 buah negara. Alhamdulillah, mereka berjaya. *They are doing very well.* Pekerja sahaja pun 5000 orang lebih. Kita perlu balik semula kepada satu kaedah yang mana kita tidaklah berperang dengan Allah dan Rasul. Hari ini, mulanya kehidupan, kita sudah berperang dengan Allah dan Rasul. Walaupun Malaysia ini negara Islam tetapi bunga tetap dicaj. Jika lambat bayar dan sebagainya, semua dicaj. Jadi, ini pilihan kita. Terpulanglah kepada kita hendak ke mana. Saya rasa sebenarnya isu KWSP ini tidaklah besar mana kerana budak-budak yang berniaga di tepi jalan pun mampu membayar zakat sebanyak RM5000. Saya lihat antara masalah besar kita pada hari ini, kita ini ibarat Sungai Klang. Kutip sampah hari-hari, tetapi sepatutnya kita naiklah ke atas dan lihat siapa yang membuang sampah itu, contohnya. Saya hendak kongsikan sedikit sahaja lagi, ada rakan kita yang mencipta perangkap sampah. Masalah utama penjaga-penjaga sungai ini ialah sampah. Jadi, mereka cipta ini mereka cipta bahan penangkap sampah dan dia juga telah mendapat geran lebih kurang RM4 juta untuk memberi mesin ini agar dapat digunakan oleh sesiapa yang mahu. Saya mendapat tahu bahawa tiada sesiapa yang mahu. Saya sampai pergi ke beberapa majlis tempatan, jabatan-jabatan berkaitan yang menjaga sungai, semua tidak mahu mesin tersebut walaupun sampah setiap hari bertambah. Sehingga saya berjumpa dengan Menteri pada hari itu, pelbagai alasan yang diberikan. Akhirnya terbongkar bahawa sekiranya mereka mengambil mesin percuma, dari mana mereka hendak mendapatkan tender? Jika tiada tender, dari mana datangnya wang? Jadi, apa yang kita hendak buat? Jika kita tidak pulang semula kepada pangkal jalan, kita tidak bersungguh-sungguh dalam apa yang kita hendak lakukan, saya rasa dalam 5 tahun kita akan bekerja di Indonesia dan kita pun mungkin akan menjadi seperti orang Rohingya tidak lama lagi. Ini terpulang kepada kita. Isu ini merupakan isu yang perlu kita lihat secara serius pada permulaan kita sendiri. Jika hari ini kita sudah mulakan rasuah, perkara lain sudah tidak jadi apalah. Itulah sedikit pendapat saya.

**Lokman Hakiem Abd Samad (moderator) = (1:05:16 – 1:06:12)**

Baik, terima kasih Toqqi. Kita boleh katakan sebagai satu kesimpulan yang agak padu di mana kita terpaksa akui bahawa kita lemah dan zaman generasi saya telah tinggal untuk berjuang. Jika sampai kepada saya pun tidak buat begitu, nauzubillah. Tidak tahu apa yang akan jadi kepada anak-anak saya nanti. Kita hendak dengarkan pula kesimpulan daripada Tuan Haji berkenaan topik kita pada malam ini. Adakah KWSP ini penyumbang ekonomi rakyat dan atau bagaimana? Silakan.

**Dr Haji Abd Halim Husin (ahli panel) = (1:06:15 – 1:11:11)**

Berkenaan dengan KWSP ini, memang menyumbang kepada ekonomi rakyat. Walau bagaimanapun, ia berada pada posisi yang jika kita hendak kata bahawa ia membantu rakyat secara terus memang tidak ketika kita berada dalam kesusahan sekarang. Tetapi ia ditubuhkan khas untuk menjaga perbelanjaan selepas persaraan. Jadi, kita perlu menambah baik perkara yang boleh dilakukan oleh KWSP seperti menjamin pinjaman yang dibuat di BSN dan sebagainya. Ini akan memudahkan mereka meneruskan hidup mereka terutama 70,000 orang yang mendaftar di PPIM dan saya rasa jumlah itu kurang daripada jumlah sebenar. Kepada usahawan, caruman hanya boleh dilakukan beberapa tahun yang lepas. Sebelum ini, usahawan tidak mencarum kerana pencaruman sendiri tidak dibuka kepada usahawan. Jadi, sekiranya employee hendak mencarum untuk diri sendiri sebelum ini tidak boleh, tetapi sekarang sudah boleh dilakukan. Jadi, ini adalah pembaharuan yang telah KWSP buat dan saya harap perbincangan yang telah dilakukan dengan kerajaan dan badan tertentu, kita dapat mengubah persepsi mereka dan cuba mendapatkan mereka melihat ke bawah tentang apakah sebenarnya yang diperlukan oleh rakyat sekarang dan pada masa yang sama mengubah sikap mereka untuk membantu rakyat. Seperti yang Toqqi sebutkan, PRU-15 ini kita perlu membuat keputusan yang lebih baik supaya kita mendapat orang-orang yang lebih baik untuk mentadbir negara ini. Sebelum saya akhiri, kita sudah berbincang dengan pelbagai pihak, kita akan mengadakan BMF 2.0 pada tahun ini. Jadi, ia akan lebih teratur dan kita harap PPIM yang memang ada dalam BMF akan bekerja dengan lebih kuat supaya kita dapat sama-sama menjayakannya. Kami di Dewan Melayu sentiasa bekerja keras dan kali ini kami akan mengadakannya secara lebih komprehensif

dan teratur dan melibatkan beberapa pemborong dan pengeluar selain daripada peruncit. Kita juga ingin memasukkan industri perkhidmatan dalam BMF 2.0 ini.

**Dato' Nadzim Johan (ahli panel) = (1:11:12 – 1:11:45)**

Pengguna juga perlu faham. Pengguna perlu beli, jika tidak beli tidak jadi apa juga. Pengguna perlu indoktrinate. Kita gagal dalam indoktrinasi. Kita indoktrinate sekali lagi, insyaAllah. Ini semua harapan-harapan untuk kita berganding bahu menyelamatkan bangsa kita.

**Lokman Hakiem Abd Samad (moderator) = (1:11:46 – 1:12:24)**

Baik, dengan komentar daripada Tuan Haji tadi, maka berakhirlah sesi perbincangan kita. Malam ini kita sepatutnya mempunyai 3 orang panel tetapi Tuan Syed meminta diri kerana uzur sedikit. Biasanya kita akan ditemani dengan Tuan Syed Karim tetapi Tuan Syed Karim sibuk pada hari ini. Dengan itu, Perbincangan Rakyat Demi Melayu sudah sampai ke penghujung rancangan dan kita mengucapkan terima kasih kepada penonton kerana masih setia. Dengan itu, terima kasih juga kepada para panel kerana sudi berkongsi idea dan sama-sama kita doakan BMF 2.0 dapat dilaksanakan dengan mantap, InsyaAllah. Assalamualaikum dan selamat malam.